

# **EBBALUWA OYUDA EGIYAWANDIIKIRE Enyanjula**

Ebbaluwa egibeeta eya *Yuda* bagiwaire liina ly'omuwandiiiki. OYuda alaga ati muganda wa Yaakobbo, omuganda wa Yesu. Ebbaluwa eenu, yagiwandiikiire baabo oKibbumba oIte-waiswe abeyayetere era abaataka, era abo oYesu Kurisito abaakuuma (1:1). Kyezyeka okubba ng'ebbaluwa eenu, bagiwandiikire ooti mwanka gwa 60 nga bamalire okubyala oKurisito.

Ekigendererwakyе omu kuwandiikira abaikirirya bonabona ebbaluwa eenu, niikwo okubalabula oku beegesi ab'obubbeyi ibo okutabaliibya (1:4). Ekyo akikola ng'aajulira oku byabbairewo omu Ndagaano eNkaire. Omu bbaluwa eenu, ebiseego bingi bifaanana n'ebiri omu bbaluwa ya Peetero eyokubiri n'okutwaliryamu okulabula oku beegesi b'obubbeyi (Yud 4; 2Pe 2:1) era n'okwijulira oku bamalaika n'oSodoma n'oGomola.

## **Engeri egibyecaanamu**

1. Okweyanjula (1:1-2).
2. Okubalabula oku beegesi b'obubbeyi (1:3-4).
3. Ebyokuboneraku omu Ndagaano eNkaire (1:5-16).
4. Abalaabbira okusigala omu kwikirirya (1:17-23).
5. Okuwuuja oKibbumba (1:24-25).

<sup>1</sup> Ninze oYuda omuweererya wa Yesu Kurisito, era omuganda wa Yaakobbo. Mpandiikira inywe oKibbumba oItewaiswe abeyayetere era abaataka, era inywe oYesu Kurisito abaakuuma.

<sup>2</sup> Kale nsaba nti okusaasira n'eidembe n'okutaka ebizwa egiri oKibbumba byeyongerenge mwinywe.

*Abantu abasomesya ebyobubbeyi*

<sup>3</sup> Atyanu bainange abatake, waire nabbaire njunjumiriire kubawandiikira inywe ku bulokole nze na inywe owetwasunire, neye tete mbona nga nteekwa kubawandiikira ku nsonga gendi. Iyo eyo nga niyo ey'okubakubiriza inywe mwefudeku okulwanirira okwikirirya okwo oKibbumba okweyawaire abatuukiriryebe abatukulye omulundi gumo lumala.

<sup>4</sup> Kale mbawandiikira ebbaluwa eenu olw'okubba waliwo abantu abeegesya ebyobubbeyi ababasodookereire ni babaizamu omu kibbula kyanywe. Cooka ibo ekibonerezo kyabwe bamalire ira n'oku kitumulaku omu Biwandiike. Era abantu abo ibo tibawa oKibbumba ekitiisya, era ibo basinzirira ku kiidi ekibamaite bati oKibbumba waiswe iye w'ekisa. Kale ni bakisuuca idembe ly'okubona bati bayezya okusigala nga bakola ebyobulendi, era n'okutaikirirya bati oYesu Kurisito niye omufugi akira obukulu era oMusengwa waiswe yenkani.

<sup>5</sup> Era waire ng'ebyo byonabyona mwabi-maite ira, ntaka okubebukirya nti oMusengwa

iye oKibbumba\* yanunwire abantube aBaisir-airi okuzwa omu kyalo ky'e Misiri, neye oluzwanyuma yajigiriciryeye mwibo abo abagaina okumwikiririryamu.

6 Era mwebukiryeye ebyatuukire n'oku bamalaika badi ibo abanandi batuukirirya obuvunanyizibwa bwabwe obw'okubba omu bifo byabwe ebyo ebibabbaire babateekere okukolamu neye ni babizweramu nakimo. Ibo abo oKibbumba abakuumira mu ndikiirya nga basibe oku njegere egitatiika emirembe n'emirembe, okutuuca olunaku olukulu irwo olwo olw'okusaliraku emisango owerwalituuka.

7 Era omu ngeri ooti yeeyo, mwebukiryeye ebyatuukire n'oku bantu b'omu kibuga ky'e Sodoma n'eky'e Gomola, n'ebibuga ebindi ebyeruguliriirye aawo, abeewaireyo ni bakola ebyobulendi ni batuuka n'okulya ebisiyaga. Ibo abo bakola ng'ekyokuboneraku ky'abo abagada n'ekibonerezo eky'omusyo ogutalikira.

8 Era n'abantu ababaingiiremu abo nago abanyooma oKibbumba batyo niye owebeebitya. Basinzirira oku birooto byabwe ni bakola ebyobulendi era ni bajeemera ab'obwezye era ni batumula ebibono ebibbibbi oku bibbumbwe eby'ekitiisya eby'omwigulu.

9 Obanga n'oMikairi omalaika omukulu oweyabbaire ng'akayaana n'oSitaani olw'omulambo gwa Musa, iye kadi oMikairi yena tiyavunaanire omu byakalebule oSitaani,

\* 1:5 1:5 Ooba, *Yesu*. 1:5 1:5 Kuz 12:51; Kub 14:29-30 1:7 1:7 Nta 19:1-24

wazira yakobere-bukobi ati, “OMusengwa iye oKibbumba† akunenye!”

10 Cooka ibo abeegesi b’obubbeyi abo bakolokota buli kintu kyonakyona ekibatategeera. Ibo beebitya ooti bisolo ibyo ebitaseega kale beekolera kiidi emitwe gyabwe ekigibawa, kaisi ng’ebintu ebyo niibyo ebigira ni bajigirika.

11 Wobe! Abo nga baliraba! Ekyo kityo olw’okubba ibo batambulira mu bwomi obw’ekibbikibbi ooti Kaini obuyatambuliiremu. Era bona olw’okululunkanira ebyobusuni, bakolere ekisobyo ooti Bbalamu ekiyakolere. Batyo bona bajeemeire oKibbumba ooti Koola oweyakolere n’olwekyo bona balijigirika omu ngeri enanyere eyo.

12 Kale dala abeegesi b’obubbeyi abo b’akabbikabbi ino oku mbaga gyanywe awemukumbaanira ng’aboluganda, era ni bagikaisya okwaba kusani. Ibo mpaawo gubafaaku kale ni babbeera nakimo ooti baliisya b’entaama badi abatafa oku kisibo neye ni babba ng’abafa ku kwikutya bida byabwe byonkani. Ibo tibagasa ooti bireri ompunga ebyatambulya neye nga tibizwamu ikendi. Era ibo bamalamu amaani ooti misaale egitabbaaku ebineneka omu kiseera ky’amakungula, era ooti giidi egifeereire nakimo era ni bagisimbuliza n’emiri.

13 Era abantu abo babulaku obukuumi ooti mayengo g’oku nyanza, kaisi batyo nakimo

---

† **1:9 1:9** Ooba, *Yesu*. **1:9 1:9** Ama 34:6; Dan 10:13,21; 12:1; Zak 3:2; Kub 21:7 **1:11 1:11** Nta 4:3-8; Kub 22:1-35; 16:1-35

ng'amayengo owegazwamu eifulo erifuduuki bona ebikole byabwe ebibazwamu by'ensoni. Era endungamya yaabwe tinteereeri ooti nkota egindi egitambula gityogityo egiteezya okubba endagirira y'omuntu, era ibo babategekeire kifo ky'endikiirya ey'amaani egibateekwa okubba emirembe n'emirembe.

<sup>14</sup> Era oku basomesya abanyere abo nago Enoka ow'ekizukulu kyomusanvu okuzwera nakimo okwAdamu, beyalagwireku oweyakobere ati, "Aale mubone oMusengwa oYesu aiza n'enkumi n'enkumi gy'abamalaikabe abatukulye,

<sup>15</sup> iye aiza okusalira buli muntu omusango. Era ayaba okugusala okusingisya bonabona abo abatatya oKibbumba, olw'ebikole ebibibibbi byonabyona ebibakolere ebiraga okutamuwa ekitiisya. Era okusingisya abantu omusango olw'ebibono byonabyona ebibibibbi, ibo abakola ebibibibbi abatamuwa ekitiisya ebibatutumwireku."

<sup>16</sup> Abantu abo nago ibo baadi abasiiba kwezuluguma era n'okunonenkererya bisobyo ku bantu. Era ibo beekolera bikole ebibibibbi okusinzirira okumanwali g'emyoyo gyabwe. Ibo beenyumiriza ino, era bawaanawaana abantu mu kubakiina olw'okutaka kusuna biibyo ibo abananyere ebibataka.

### *Okulabula n'okulaabbira kwa Yuda*

<sup>17</sup> Neye inywe bainange abatake, mwebukirye ebintu abatume ba Musengwa waiswe oYesu Kurisito ebibalagwire.

18 Babakobere inywe bati, “Omu naku egy’oluzwanyuma, abantu baliiza abalijerega oMusengwa oYesu aamo n’abantube, era abo nago balikola ebikole ebibbibbi ebyo ebibalibba beegombere okukola anambula kutya Kibbumba.”

19 Era abantu abo nago babaleetera okwawukanamu, era ibo bakolera ku nseega embiibbi egy’obuntu era ibo babula oMwoyo oMutukulye.

20 Neye inywe bainange abatake, obwomi bwanywe mubukulirye mu kwikirirya kwanywe obutuukiriire eino era owemubba musaba, oMwoyo oMutukulye niye abbe abalungamyenge.

21 Era mweyongerenge okubba omu kutanganana okwo okwa Kibbumba nga wemukuumiriire oMusengwa waiswe oYesu Kurisito okubakwatira ekisa, ikyo ekyabatuuca omu bwomi obutawaawo.

22 Era abo ibo ababusabuusa mubakwatirenge ekisa.

23 Kale abantu abo abandi abaikirirya enjegyeya ey’obubbeyi mubabbeerenge okubairya omu kwikirirya. Omu ngeri eyo mwabba nga muli kubanyagula kuzwa mu musyo ogutalikira. Tete n’abandi ibo abateemeire enseega embiibbi egy’obuntu bona mubakwatirenge ekisa neye nga mubekuuma. Era mucaawenge n’obwomi bwabwe obwo owebalimu owebikole ebibbibbi.

*Okusaba kw’okuwuuja oKibbumba*

24 Aale atyanu mumuwuujenge iye oKibbumba ayezya okubakuuma ni mutaingira omu kibbikibbi era n'abatuuca omu kitiisyakye nga mubulaku ekyokubanenya era nga muli n'okujaagaana okw'amaani.

25 Abantu nga babita omu Yesu Kurisito oMusengwa waiswe, bawenge oKibbumba omoiza oyo ekitiisya, iye nago oMulokoli waiswe, era ow'amaani era ow'obwezye. Era niiye eyabbairewo okuzwera nakimo ng'emigigi gy'abantu gikaali n'okubbaawo, era niiye akaali atyo n'omu mirembe ginu era eyalibbaawo emirembe n'emirembe! Amiina.

**ENdagaano eMpyaka oMu Lugwere**  
**Gwere: Endagaano Empyaka Omu Lugwere (Bible)**

copyright © 2017 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

03698e2d-9c8d-5b1f-bc49-b0066e860180